

Na osnovu člana 184. stav 3. Zakona o investicijskim fondovima („Službene novine Federacije Bosne i Hercegovine“ br 85/08), Komisija za vrijednosne papire Federacije Bosne i Hercegovine, na sjednici održanoj 17.6.2009. godine d o n i j e l a j e

**PRAVILNIK  
O USLOVIMA ZA STICANJE OVLAŠTENJA ZA PRODAJU  
DIONICA ILI UDJELA INVESTICIJSKIH FONDOVA SA JAVNOM PONUDOM**

Član 1.

Ovim pravilnikom propisuju se uslovi, način sticanja i priznavanje ovlaštenja za prodaju dionica ili udjela u investicijskim fondovima sa javnom ponudom za fizička lica u pravnom licu i fizička lica koja po posebnom ugovoru obavljaju te poslove za društvo za upravljanje.

Član 2.

Fizičko lice u pravnom licu i fizičko lice koje po posebnom ugovoru obavlja poslove prodaje dionica ili udjela u investicijskim fondovima sa javnom ponudom za društvo za upravljanje mora da ispunjava slijedeće uslove:

- a) da ima najmanje srednju stručnu spremu;
- b) znanje jednog jezika koji je u službenoj upotrebi u Federaciji Bosne i Hercegovine (strani državljani dokazuju potvrdom o znanju jednog od jezika koji je u službenoj upotrebi u Federaciji Bosne i Hercegovine);
- c) uvjerenje nadležnog suda da nije potvrđena optužnica, a za strane državljane uvjerenje nadležnog organa zemlje čiji je državljanin, te ovjereni prijevod od strane ovlaštenog prevodioca iz Federacije Bosne i Hercegovine.

Član 3.

Fizičko lice koje po posebnom ugovoru obavlja poslove prodaje dionica ili udjela u investicijskom fondu sa javnom ponudom ne smije primati novčana sredstva za kupovinu dionica ili udjela u investicijskim fondovima sa javnom ponudom.

Član 4.

(1) Obaveza je društva za upravljanje da, prije potpisivanja ugovora o poslovnoj saradnji za obavljanje poslova prodaje (u daljem tekstu: Ugovor) utvrdi da fizičko lice iz člana 2. ovog pravilnika ispunjava uslove propisane Zakonom o investicijskim fondovima (u daljem tekstu: Zakon) i ovim Pravilnikom.

(2) Društvo za upravljanje je dužno pismeno obavijestiti Komisiju za vrijednosne papire Federacije Bosne i Hercegovine (u daljem tekstu: Komisija) o potpisivanju ugovora sa fizičkim licem.

(3) Fizičko lice u pravnom licu i fizičko lice koje po posebnom ugovoru obavlja poslove prodaje dionica ili udjela u investicijskom fondu sa javnom ponudom mora da svakom potencijalnom investitoru uruči:

- a) prospekt i statut investicijskog fonda,
- b) promotivni materijal investicijskog fonda koji je Komisija odobrila i
- c) dokaz o ovlaštenju za zastupanje društva za upravljanje, koje izdaje društvo za upravljanje.

Član 5.

- (1) Društvo za upravljanje je obavezno da mjesečno dostavlja Komisiji ažurirani spisak lica s kojim je sklopilo Ugovor.
- (2) Spisak iz stava 1. ovog člana za fizička lica mora sadržavati:
  - a) ime i prezime lica,
  - b) adresu prebivališta/boravišta,
  - c) zanimanje i
  - d) odnos s društvom.
- (3) Spisak iz stava 1. ovog člana, ukoliko se radi o fizičkom licu u pravnom licu, mora da sadrži, osim podataka o fizičkom licu iz stava 2. ovog člana, podatke o pravnom licu, i to: naziv, firmu, matični broj i sjedište.
- (4) Pravno lice mora da vodi evidenciju fizičkih lica – zaposlenih, koja su ovlaštena za prodaju dionica ili udjela u investicijskim fondovima sa javnom ponudom, koju je društvo za upravljanje dužno da dostavi Komisiji na njen zahtjev.

#### Član 6.

Društvo za upravljanje je odgovorno za postupanja lica sa kojima je sklopilo Ugovor o prodaji dionica ili udjela u investicijskim fondovima sa javnom ponudom.

#### Član 7.

Ovaj Pravilnik stupa na snagu osmog dana od dana objavljivanja u „Službenim novinama Federacije BiH“

Predsjednik  
Komisije za vrijednosne papire  
Federacije Bosne i Hercegovine

mr Hasan Čelam

Broj:01-02-2188/09  
Sarajevo, 17.juna 2009.godine